

天心天外四維中 普願一切成妙道
發願已皈命禮無上至真三寶

誦經 回向

伏以一聲聖號能消劫劫之災眾詠真名可
長生生之福言之難盡讚亦莫窮恭按冲科
仰瞻妙相嚴陳讚詠之理備伸懺悔之誠惟
天聽之匪遠冀人心之可格伏願惟宏慈之
莫大念羣品之可哀俾蕩滌於前非盡釋赦
於宿對丹書紀善碧簡延生眷屬安寧永處
福齡之地九玄超度盡離幽暗之鄉以臻諸
福則何福不臻以滅諸災則何災不滅千靈
擁護萬事亨通倘副愚衷敢忘效驗稽首皈
依志心稱念福生無量天尊不可思議功德
北極真武佑聖真君禮文

太清中黃真經釋題

畫一

中黃經亦曰胎藏論胎藏論者九仙君黃真
人所集也真人常觀察元炁浩然凝結成質
育之以五藏法五行以相應明之以七竅象
七曜以昭晰其識潛萌其神布行安魂帶魄
神足而生形神相託神形相成口受外味以
忘識身受內役以喪精神離形以散壞形離
神以去生殊不知皮肉相應筋骨乃成肝合
筋以外爪心合脉以外色脾合肉其外唇肺
合皮其外毛腎合骨其外髮鹹傷筋苦傷骨
甘傷肉辛傷氣酸傷血故聖人曰先除慾以
養精後禁食以存命是知食胎炁飲靈元不
死之道返童還年此蓋聖人之所重也且夫
一士專志下學而上遠一夫有心觀天道之
不遠學而無至謂之愚不學不知謂之蒙然
三蟲未去子踐荆棘之田富三蟲已亡自違
華胥之國顯彰雲路備述胎仙知聖行之根
源辨仙官之尊位至於霞衣羽服玉館天廚
蓋為志士顯聊泄天戒非人妄告殃爾明微
密此聖門必登雲路慎無傳於淺學稽首示

於斯文慢而折神輕言損壽若非志士無得
顯言總一十八章列成一卷號曰胎藏中黃
經皆以篇目相銜之句相繼義精於成道言
盡於養生行顯意真事具文切食炁之理備
載歸天之道悉成授筆錄章列篇於後